



Inatsisartuni ilaasortaq Aleqa Hammond, Siumut
Maani

30. juni 2010
Sagsnr. 2010-033144
Dok. Nr. 407993

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nanoq.gl www.nanoq.gl

Akissut 2010-141 ALHA misileraalluni aalisarneq

Inatsisartut suleriaasianni § 36, imm. 1, naapertorlugu sumi misileraalluni aalisartoqarnersoq aamma najukkani aalisartut piniartullu peqatigiiffii qanoq peqataatinneqartarnerat pillugu apeqquteqarputit. Suliassaqarfigisama iluani .apeqqut akisassanngortinneqarsimavoq

Apeqqut imaappoq:

”Nunatsinni sumi maannakorpiaq misileraalluni aalisartoqarpa aammalu misileraalluni aalisartoqartillugu aalisartut piniartullu peqatigiiffii qanoq peqataatinneqartigalutillu ilisimatinneqartigisarpat?”

Apeqqummut akissut:

Ilisimatitsissutigisinnaavara 2010-mi Kitaani avataasiorluni misileraalluni saarullinniarsinnaanermut killilimmik akuersissuteqartoqarsimammat. Taama aalisarneq Kalaallit Nunaata aalisarneq pillugu Norge-mik isumaqatigiissutaanut ilaavoq, tassani Norgemiut angallataat ningittagarsuutaasoq imartami ersqqinnerusumik killeqarfiligaasumi aamma piffissami erseqqinnerusumik sivisussusilimmi aalisarsinnaatitaavoq. Aalisarnermi tamatumani saarulleqassutsip qanoq innera pillugu pitsaanerusumik ilisimasaqalernissaq siunertarineqarpoq.

Aammattaq ilisimatitsissutigineqarsinnaavoq illugiilluni Savalimmiunik isumaqatigiissuteqarnikkut Tunumi avataasiorluni misileraalluni ilaatigut saarullernamik (brosme), saarullinik aamma raajanik killilimmik aalisarnissamut periarfissiisoqarmat. Ukiuni arlaqartuni taama aalisarneq isumaqatigiissummut tassunga ilaavoq.

Kingullermik maj 2010-mi avataasiorluni aalisarnermut atatillugu makrelinik, hestemakrelinik, ammassassuarnik (atlantoskandiske sild) aamma kapisilinnik (guldlaks) Tunumi 66°N-ip avannaani misileraalluni aalisarnissaq akuerineqarpoq. Taamatut misileraalluni aalisarnissami aalisakkanik tamakkuninnga Kalaallit Nunaata imartaani qanoq annertutigisumik peqarnerseq qulaajarneqassaaq taamaalillunilu naliliisoqarsinnaalissaaq, tamakkuninnga aalisarnissaq kalaallinut aalisartunut iluaqutissatut ineriartorteqqinneqarsinnaassanersaq.

Misileraalluni aalisarnissaq eqqarsaatigalugu pissusissamisoorpoq matumani avataasiorluni aalisarnermi najukkani aalisartut piniartullu peqatigiiffiisa killilimmik ilaatinneqarnerat. Taamaattoq tamatumunnga atatillugu erseqqissaatigisavara, aalisarnermut taamaattunut tunngatillugu siunnersuutit Pinngortitaleriffimmut aamma suliaasaqarfimmut susassaqtartunut tusarniaassutigineqartarmata.

2010–mi sinerissamut qanittumi aalisarnermi Qeqertarsuup Tunuani misileraalluni qassusersorluni qalerallinniarnissamut akuersissuteqartoqarpoq. Misileraalluni aalisarneq ingerlanneqarsinnaavoq Oqaatsut eqqaanni Niaqornaarsummi, Kangip eqqaanni Appat avataanni aamma Niaqornap eqqaanni. Najukkami aalisartut peqatigiiffiat qinnuteqaammik nassiussisuuvoq aamma Qeqertarsuup Tunuani qalerallinniarluni aalisarnissamut akuerineqarpoq.

Aammattaaq ilisimatitsissutigisinnaavara Kommune Kujallermi Narsap eqqaani misileraalluni eqqusarniarnissaq (søpindsvin) aamma inalugalinniarnissaq (søpølser) akuersissutigineqarmat. Aalisarnissami tassani piumasaqaataavoq eqqusarniarnermi aamma inalugalinniarniermi pisat pillugit Kommune Kujallliup paasissutissanik nassiussisarnissaa.

Inaarutaasumik ilisimatitsissutigisinnaavara piffissami qanittumi Tunumi misileraalluni eqalussuarnik aalisarneq ingerlanneqarsimammat. Aalisarneq tamanna Kommuneqarfik Sermersuup aamma KNAPK-p akornanni suleqatigiinnikkut ingerlanneqarpoq.

Isumaqarpunga sinerissamut qanittumi misileraalluni aalisarneq pineqartillugu, najukkami aalisartut piniartullu peqatigiiffii aalisarnermut tunngatillugu KNAPK-mi sinniisuutitaqarnertik tunngavigalugu ilaatinneqartartut. Aammattaaq isumaqarpunga, najukkami soqutigisat ilaatinneqartillugit annerusumillu qinnuteqaateqarneq tunngavigineqartillugu najukkami aalisarnermik peqatigiiffiit tunuliaqutaalluartartut.

Naggataatigut erseqqissaatigerusuppara pingaarteqigakku, sapinngisamik ajornanngippat najukkami soqutigisat ilaatinneqartarnissaat, aamma uanga siunnessami sulissutigerusukkakku najukkami isummat aalajangiiniarniermi ilaatinneqartarnissaat, akisussaaftimma iluani aalajangiisoqassatillugu.

Inussiarnersumik inuulluaqqusillunga

Aalisarnermut, Piniarnermut Nunalerinermullu Naalakkersuisoq